

اجتماعی

موسیقی - اخلاق سقوطی

سر لوحه من نظر لک دقتی جلب ایتکدن هیچ بر وقت خالی قالمیه جق و: موسیقی ایله سقوط اخلاق بربرلیله نه مناسبتی وار؟ دنیه جک در. هر یرده موسیقی نك اخلاق تصفیه سنه خدمت ایتدیکی ادعا اولونورکن ، سقوط اخلاق موسیقی ده آرامق عبث اولمازی ؟...

اوت ، موسیقی آئی اخلاق یارادیله سی ایچون چوق کره مهم بر مؤثر اولمدر . مکتبلر موسیقی بر تربیه عاملی اوله رق قبول ایتشدر . بو باده موسیقی بویوک بر موقع قازانمدر . فقط بو کون بزده کی موسیقی ، بزده کی شرقی و تورکولر او مزیتدن تامایله خارج در . مملکت مزده موسیقی بو کون یوز قیزارته جق بر شکل آلدیغی اعتراف ایدم .

مملکتک تربیه عمومی سنی عائله لر ، محیط طوغورور . مکتبلر افرادی ، عائله لرک کوچوک رک نلرینی تربیه ایدر ، انان ایدر . مکتبلر بو خصوصده بویوک و قیمتلی بر مؤثر در ؛ مؤثر در اما محیطک ، عائله تربیه سنک چوق کره مکتب تربیه سنی ، تربیه اساسیه یی ده اخلاقی ایلدیکی مشاهدده ایدلشدر .

مکتبلر چالیشیر ؛ متمادی بر ماده نك اصلاحی ، چوجو غک تربیه سی ایچون متمادی غیرت صرف ایدر ، یورولور . صوکر ا چوجوق محیطنده راست کلدیکی برشیدن ، ابونک اهل ایلدیکی بر ماده دن تامایله بوزولور ، مکتبک بوتون مساعیسی هبا اولور . تربیه عمومی نك ، استقبالك ، حالک قهرمانی عد ایدلن مکتب مدهش برامل سقوطی قارشیننده قالیر ...

بونی چوق مکتب ، چوق خوجه حس ایتز و آغلاماز ، آغلایه ماز . فقط سعینی ، فدا کارلغی ، محیط خصوصی نك قیردیغی کوروب آغلایان اصل مکتبلر ، خوجه لده اکسیک دکدر .

بوکون قالمه ، استانبولی ، بویوک شهرلری می محله محله طولاشلم . کویله قدر واردم . نه لر کورور ونه لر ایشیدیریز . کوردیکلر من آجی حقیقتلر در . اونلرک تدقیقنی بر طرفه براقلم . ایشدکلمزدن بری ده موسیقی در . اوموسیقی که بوتون موجودیتی ، بوتون ماهیتی ایله اجتماعی یاره لدر .

برکنج قیز ، برکنج ارکک چوجوق آغزی ایله باغیریز ؛ بر شرقی نك برعوام تورکی سنک آچاق ویوکسک آوازه لر ایله کفته سی قولانغمه آرییز . آغزلرده کزنه بو کفته لر ، هپ سویله یه نلره اخلاق سزلق ، عادیلک تعلیم ایدر . والده ، پدر ، قومشو بر تورکی ، بر شرقی سویلر ؛ صریلار ؛ چوجوق بونی دیکار ؛ بوتون اینجه لکیله اوکره نیر ، اوده سویلر . بو شرقی ده کندیسنه سقوط اخلاق توصیه ایتشدر .

بونلری کنج قیزده سویلر . باباسنک ، آنه سنک ، خاله سنک ، بوتون بویوکلرینک ، اقرانلرینک ، قریلرینک ایشیته جکی صدا ایله سویلر . اونلرده ایشیتیر ، کمال سکونه ، بلکه ده ممنونیتله دیکلر ؛ آلقیشلارلر . نه نی آلقیشلایورلر ؟ نه نی دیکلایورلر ؟ ... بو شرقیلر یوز قیزارتمیورمی ؟ کنج قیزی اوتان دیرمیوری ؟ ... ابون بونی ناصل دیکلایور ؟ ...

شو محقق که بو کون بو آچیق شرقیلره هیچ اهمیت ویریلیور . بونلری دیکلمک احوال عادیه دن عد اولونویور . صوکر ا ابون باشقه خصوصاتده عصیله شیور . کندی مساعده سیله اخلاق سزلق اوکره تیورده ، صوکر ا بو مساعده سنک نتیجه طبیعیه سنه حدت ایدیور ، تعصب کوستریور ...

بو شرقیلردن بر قاچنی تعطیل مناسبتیه استانبوله ، روم ایلی و آنا طولی نك بعض یرلرنده بولندیم ائنده طولیلام . بونلری بوراده یازمقله ، بو صحیفه لر کیرلنر ظن ایدرم . شرقیلرک بوتون رزیمک افاده ایدن سطرلرینی اوقویه لده اوکا کوره مضرتی تقدیر ایدم :

ایشته بری :

آطه لر ساحلنده بکیورم
یارم سنی سریعاً ایستیورم

بردیگری :

بویله ده قاش ، بویله ده کوز
بویله ده کوزلر کیمده ده وار .
اینجه ساز ، دوز راق
ناز وادا بزده ده وار ...

دیگری :

الف اوستنده میملر !
یاقدی بی او دیلر ..
بم یوره کده سنسک ،
سنک یوره کنده کیملر ؟ ..

دیگری :

آمان آمان فنیدیق
نه کوزلده قیردیق
جویز ایچی بادمده شام فستیق
قاره قاره قاشلر
اوزوم کی کوزلر
اوبیاض کرداندن اوپمه لی !

دیگری :

چک دوه جی دوه لرینی یوقوشه آمان
کل مه لر بربرینه طوقوشه آمان
هایدی آلمانا یناقلی ، هایدی کیراز دوداقلی ...

دیگری :

آلمانا یه یانغیم آمان
جلوه سنه بایغیم آمان
هر حالی خوشنه کیدیور .
عقلمی باشمدن آلیور .
آمان کوزمل آلمانا
کوکلم سکا سودالی
پک خوشمه ده کیتدی .
آه سنی ناصل صارمالی ؟ ...

دیگری :

اوغلان یایی ، قیز ویدالی (! !)
طایانه میوروم غیری
بن عسکره کیدیوروم ،
حالالاشایم غیری ...

دیگری :

قالدی آتشلر ایننده ینه سودالی سرم
نره دن کوردی سنی قهر اوله سی دیده لرم .
کورسم آرار ستم ، کورمه سم آرتار کدرم .
نره دن کوردی سنی قهر اوله سی دیده لرم .

دیگری :

سینه می صد پاره قیلدی تیر مژگانک هان
مرحمت قیل نازی یارم حالم اولدی پک یمان
قائمه اغیاره افندم ، لطفنه کلدی زمان
مرحمت قیل نازی یارم حالم اولدی پک یمان .

دیگری :

ایک کوملک یتیشیر، انتارینی آت ،
تنزل ایله ، کل آغوشیمه یات ! ..

داها نه لر، نه لر... دقت ایدیکز، بونلری کنج قیزلر، قادینلر، دلیقانلیلر
سویلیور. عمومی یرلرده تغنی ایدیلیور. ایشته بزده سقوط اخلاقه چالیشان
موسیقی! .. بوتون بوتعطل سیاحتمده کنجلر آغزندن بوشرقیلری، بوبسته لری،
بوکفته لری دیکله دیم . مستثنالری پک آز، پک آندر ...

بو سفیل موسیقی تربیه ملیه مری تولدورویور، بوزویور. اخلاق ملیمزی
اعدام ایدن بز. خارجدن بز. بونک ایچون کلن نمونه لر یوقدر. بز اتخار
ایلیورز. بوقادار آچیق، صاچق شرقیلر آوروپاده یوقدر. داها آچیق لری
وار ایله ده عائله آره سنه کیره مری، اوسفل یرلرده، آیشلر آره سنده قالیر...
اخلاق سقوطی، ثولمسی تربیه عمومی یه ده خنچرلیور. فکر، بدن ده
اخلاقه برابر طولایسیله اوچورومه یورویور، هر شی فنا بولویور...
بز اصل بویله کوکدن بوزولان شیلری تربیه ایله مری یز. جبر ایله، زور
ایله خلقی آئی اخلاقی و دیندار یاپمه نك امکانی یوقدر. واسع برپر و غرامله
چالشمغه باشلامه لی. بویله چالشماز ایسه ک هپ فلاکت ...

پولیس افتدیلر سوقاقده آچیق کزه ن قادینلری ایستدکلری قدر
چویرسینلر. شیخ الاسلام افندی ایستدیکی قدر آمر و برسین، بیاننامه نشر
ایتسین، جزا اعلان اولونسون، تأمین ایدرم که هیچ بونلرک بر فائده
واهیتی یوقدر.

مرض اساسلی و ایلریله مکده دز. بز مرضک اصل تداویسی نه ایسه
اونی دوشونور، خ ته لنی جبر ایله قورقوتیورز. بویله اوستون کوروعادی
تدبیرلر ایله اسلامیتک اوغرا دینی و اوغرامقده اولدینی سقوط اخلاق تداوی
ایدیله مری. یوزلرجه مکتبلر، قیز مکتبلری، عائله لر، والدله لر، بابالر آره سنده
وعظ ونصیحتلر؛ انسانیتی دوشونور، اسلامیتی دوشونور و بونلر ایچون
چالیشیر قادین وارکدن مرکب جدی جمعیتلر بوائشی اصلاح ایدر. حکومت
ایچین، وطنداشلر ایچون، علما ایچون یاپه جق بودر. بوشرقیلر ناصل
بر اخلاسیزلی پروپاگاندا سی، پروپاگاندا جیسی ایسه بز تداویجیلر اولردن
داها قوتلی پروپاگاندا تأسیس ایله مری یز. چاره فلاح بو! ..

صاقین موسیقی نك لزومسز لغنی، علی العموم موسیقی اخلاسیزلی موجبدر
دیدیکم آکلاشیمه سین. بوتون دنیا ده اولدینی کبی محرر ناچیز بیله مکتبم ده
موسیقی بی بر اساس تربیه اوله رق قبول ایتدم. مکتبلر ده تطبیق ایدیلن
موسیقی چوجوغه، کنجه ای اخلاق، متانت، شجاعت، وطنپرورلک،
عسکرلک حسی، سعی وغیرت حسی، مسله که محبت حسی، تعالی حسی،
دیندارلی حسی ویریور


فرانسزلر بوکون کندیلرینی تولومدن، مظلم بر استبداددن قورتاران
مارسه یه زه مدیون شکر اندرلر. مارسه یه ز فرانسزلره وطنپرورلک درسی
ویردی، وطنی خلاص فکری ویردی، شجاعت و متانت ویردی ...

بزده ده ۳۲۴ انقلاب اخیرندن صوکر بویله وطنی شرقیلر، تربیوی
شرقیلر تنظیم اولونمغه باشلادی. مکتبلره کیردی. حتی جمله سنبدن بویوک
استفاده لر آله ایدلی. لکن بونلرک عددی نه بزم ایسته دیکمز قادار،
نه ده بریکی معیوب شرقیلرک وجودینی ستر ایده جک قادار ...

انسانلر موسیقی یه محتاجدرلر. حسی، انجه لکی تربیه ایدن، یورغونلنی،
مشاغل دماغیه نی کیده رن موسیقی در. فقط بز خدمت ایده جک بوموسیقی،
دیدیکم کبی نزیه، و وطنی اولمالیدر. آه لر، اوفلر ایله ایکلیه رک شهوت
وعد ایدن موسیقی پارچه لرینی تولدورمکه چالشمالی؛ اونلرک ناظم وبسته -
کارلرینی لغتله یاد ایله مری یز.

ادهم نژاد

مناستر:



انتخاب

ایران تاریخیچه انقلابی

- ۲ -

انقلاب متفکرین و محررین

شیخ جمال الدین - میرزا ملکم خان - میرزا آقا خان کرمانی و آرقا -
داشلی - اوچ غزته جی - میرزا عبدالرحیم وحاجی زین العابدین .

ناصرالدین شاهک بوتون شدت ومظالمه رغماً مملکتده بر فکر
تجدد وانقلاب پرورده ایدیلیوردی. شاه هر نه قدر بابیلک تهمتیه
خلق الهی کسیدیرمش، قیردیرمش ایدیسده فکر ترقیپورانه نی
تمامیه بتیره ممش، اونی جدی وفدا کار مروجلردن محروم براقا -
مه مشدی. دور ناصرینک بوتون ظلمت وکشتلرینه رغماً آره صره
ارباب فکر ودها برر شهاب ثاقب کبی پارلایور وافول ایدیلوردی.
فقط بوتون افوللرینه رغماً ستاره لر کیت کیده بوللاشیور، آز، چوق
ثبات کوستریور، ایران قدیمک افق تاریکنه نور تجدد صاچیورلردی.
سلسله مقالاتمزه اختیار ایتدیکمز اصول اختصاره نظراً بز بو
«ستاره» لردن آجق ایران انقلابنه، افکار احرارانه سنه اؤزیده اج ای
تأثیر ایتمش اولانلرینی قید ایتک، مجاهدات فکریه وخدمات قلمیه -
لرینک اهمیتی کوسترمکه اکتفا ایده جکز :

*
* *

ایران افکار احرارانه سنک ایلک اول میدان مجاهده یه آتیلان
متفکرلرینک باشنده سید جمال الدین افغانی حضرترلری کلیور.

شیخک اتحاد اسلام فکری مروجلردن اولدینی معلومدر. بوفکرک
صوک شکلنک مؤسسسی عد ایدیلن جمال الدین حضرترلری ناصرالدین
شاه زماننده ایکی دفعه مابین هایونده بر مقام بلند احراز ایلش،
خیالات ترقیپورانه سندن دولای ایرانندن طرد ایدلمشدر. ایلک
تبعیدینی متعاقب ناصرالدین شاه آوروپاده سیاحت ایتدیکی ائنده
مشارالیهله (مونیخ) ده کوروشمش، کندیسینی مقام وکالته تعیین
ایده جکینی وعد ایله موکب هامونیله برابر طهرانه جلب ایتمشدر.
شیخ ایکنجی دفعه طهرانه کلدکدن صوکره تکرار نقض عهدایدن
شاهک غضبه اوغرامش وقلنه اراده شاهی صادر اولمشدر. اعدامدن
اول تام معناسیله عریان اوله رق شیخ بر قاطره بندیریلهرک طهران
سوقاآلمرنده تشهر ایدلمشدر. فقط فرانسه سفارتنک مداخله سی
اوزرینه قتلندن واز کچلمش، تکرار ایرانندن تبعیدی جهته
کیدلمشدر.

ممالک اسلامیه ده داخل قانونی وعادل برر حکومت تأسیس
ایلمک، اجانبه قارشیه متحد ومتفق بر عالم اسلام وجوده کتیرمک
غایه سنه فداکارانه خدمت ایدن بویوک آدم، کرک ایرانده، کرک